

Perjuangan belum selesai, Dr. M suntik semangat baru

UM 15 SEP 2001

PERDANA Menteri, Datuk Seri Dr. Mahathir Mohamad meluangkan masa hampir dua jam di Kompleks Sukan Negara, Bukit Jalil semalam untuk menyaksikan atlet Malaysia beraksi di Pusat Akuatik Nasional dan Stadium Putra.

Kehadiran Dr. Mahathir di Pusat Akuatik Nasional ternyata memberikan semangat buat dua penerjun, Leong Mun Yee dan Rosatimah Muhamad yang ketika itu sedang beraksi dalam acara 3 meter papan anjal wanita.

Leong Mun Yee meraih pingat emas dalam acara ini selepas menewaskan pencabar dari Filipina, Sheila Mae Perez dengan mengumpulkan 474.12 mata. Shiela mengutip 458.49 mata.

Sementara pingat gangsa diraih peserta terjun negara, Rosatimah selepas dia mengumpulkan 432.27 mata.

Lebih menyeronokkan buat dua atlet negara itu

ialah apabila Perdana Menteri sendiri mengalungkan pingat emas dan gangsa yang dimenangi penerjun negara serta perak kepada Shiela.

Dr. Mahathir kemudiannya bergegas pula untuk menyaksikan acara gimrama di Stadium Putra, yang ketika itu atlet negara Celestie Chan sedang beraksi dalam acara gelung.

Perdana Menteri yang dijadualkan turut berhasrat menyampaikan pingat kepada pemenang terpaksa meninggalkan Stadium Putra kira-kira 7 malam ekoran acara tersebut masih terus berlangsung.

Acara gelung dari empat disiplin (gelung, tali, belantan dan bola) ini dimenangi oleh Goh Yi Wei dengan kutipan mata 24.375.

Bagaimanapun untuk keputusan keseluruhan, Malaysia meraih pingat emas dalam acara berpasukan gimrama ini selepas mengumpulkan mata 239.550.